

Siusinaartumik pensionisiat pillugit Namminersornerullutik Oqartussat nalunaarutaat

Siusinaartumik pensionisiat pillugit Inatsisartut peqqussutaanni nr. 4-mi, 7. maj 2007-imeersumi §12-imi imm. 3 aamma § 14-imi imm. 2 naapertorlugit makkua aalajangersarneqarput:

Ulloq unnuarlu paaqqinniffimmi allami najugaqarnermi pensionisiat tunniunneqartarnerat

§ 1. Qaammammi nuuffusumi qaammatillu tulliani siusinaartumik pensionisiat allannguuteqartinnagit tunniunneqassapput tamatumali kingorna siusinaartumik pensionisiat 20 %-ii tunniunneqartalissapput siusinaartumik pensionisialik imatut pippat

- 1) Kalaallit Nunaanni ulloq unnuarlu paaqqinniffimmut allamut nuutsinneqarpat § 12, imm. 1, siusinaartumik pensionisiat pillugit Inatsisartut peqqussutaat malillugu,
- 2) Kalaallit Nunaanni avataaniluunniit napparsimavimmut unitsinneqarpat,
- 3) tarnimikkut nappaatillit napparsimavianni imaluunniit pinerluuteqarsimasunik isumaginnittoqarfup iluani paaqqinniffimmi Kalaallit Nunaanniittumi imaluunniit Danmarkimiittumi pineqaatissinneqarnermigut inissinneqarpat imaluunniit,
- 4) eqqartuussiveqarfimmit pineqaatissinneqarluni tigummigallagassanngortitaasimappat.

Imm. 2. Siusinaartumik pensionisianik pisartagalik siusinaartumik pensionisiat saniatigut pisortanit pisartagaqarpat, soorlu kaasarfimmiusinneqarsimalluni, akissarsisinneqarsimalluni imaluunniit sulinersiuteqarsimalluni siusinaartumik pensionisiaminik ilanngaaffigineqassaaq, siusinaartumilli pensionisiassani sinneruttut minnerpaamik siusinaartumik pensionisiatut pisartakkat 20 %-iinik annertussuseqassapput.

Imm. 3. Meeqqanut tapinik pisinnaatitaaffeqarneq allannguuteqarani atuutiinnassaaq taamalu siusinaartumik pensionisiallip ataasiakkaatut pisariaqartitsinermik naliliineq tunngavigalugu inummut tapinik pisartagaqarsinnaatitaanini attatiinnassavaa, tassunga ilanngullugit inissinneqarnerup nalaani inigisap tigummiinnarnissaanut aningaasartuutitut matussutissanut pisartagaqarsinnaatitaaneq.

Imm. 4. Siusinaartumik pensionisialik angerlartinneqarpat iperagaappalluunniit siusinaartumik pensionisianik pisartagaqarsinnaatitaaneq atuutilersinneqaaq qaammatip nuuffusup ulluisa aallaqqaataaniit atuutilersumik, takuuk siusinaartumik pensionisiat pillugit Inatsisartut peqqussutaanni kapitali 3.

Meeqqanut tapit

§ 2. Meeqqanut tapit qaammatikkuutaartumik tunniunneqartassapput meeqqanut akilersuutit nalinginnaasut Inatsisartut aningaasanut inatsisaanni ukiumoortumik aalajangersarneqarsimasut amerlaqataannik angissusilerneqarsimallutik, takuulli imm. 3.

Imm. 2. Pilersuisussaataasut tamarmik siusinaartumik pensionisianik pisartagaqartuuppata meeqqamut ataatsimut tamarmik immikkut meeqqanut tapinik tunineqartassapput.

Imm. 3. Siusinaartumik pensionisialik meeqqamut akilersuisussaataappat meeqqanut tapit ukiup affakkuutaartumik tunniunneqartassapput, piffissami akilersuisussaataaffusumi allatut isumaqatigiissuteqartoqarsimanngippat imaluunniit allamik aalajangersaasoqarsimanngippat. Meeqqanut akilersuutit ukiup affaanit sivikinnerusumik sivisunerusumilluunniit tunniunneqartarpata meeqqanut tapit piffissamut tamakkiisumut atuuttut ataatsikkut tunniunneqassapput.

Imm. 4. Meeraq siusinaartumik pensionisialimmi najugaqarani allami najugaqarpat siusinaartumillu pensionisialik meeqqamut akilersuisussaataalluni, meeqqamut akilersuutit pisinnaatitaaffilimmut tunniunneqassapput.

Naammagittaalliuuteqarsinnaatitaaneq

§ 3. Nalunaarut una naapertorlugu aalajangersaanerit isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Atortuulersitsineq

§ 4. Nalunaarut una atortuulersinneqarpoq ulloq 1. juuli 2007-imi.

Namminersornerullutik Oqartussat, ulloq 27. juni 2007-imi

Finn Karlsen

/

Martha Lund Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut